

1 Intro

Melodie: "In Hell I'll be in good company" - The Dead South

Mir jage Terrorischte.
Mir bringe se i d Chischte.
Üs chasch nid überlischte.
D Verbräche hüt si schlimm wie no nie!



Zum Bischpil dä im Coop – du meinsch, dä chaufft e Salat.
Doch är schliicht meuchlings ab zu de Hemmli! Alarmstufe rot!
Scho streckt är d Pfote is abgsperrte Gschtell – doch mir si uf Droot:
„Hände hoch! Abführe!“ - Dank üs hei so Gängschter ke Brot!

Und dä do rönnt us dr Bank mit Pischtole, Gäld-Sack, voll im Spurt!
Chunnt a d Bus-Haltstell und schmeisst no rasch d Roger-Staub-Chappe furt.
Mir griiffe zue. Handschälle und ab! Dä Cheib chunnt jetz dra! - Will:
Dasch e **Bus-Haltstell!** - Und dä het jo ke Schutzmaske a!

Drum:

Pass uf, wenn hueschte settisch!
Pass uf, wenn schaffe wettisch!
Pass uf, wenn z sächste glettisch!
Mir hei nid wit. Gli isch Ornig und Rueh!

Wottsch würklech Fescht go feschte?!
Wottsch würklech nid go teschte?!
Di Nochber weiss s am beschte.
Gli wüsse mir s au – und denn schlöh mer zue!!

Berset: „Ja, es geht nicht ohne Opfer!“

2 D 5-er Regle


Melodie: «S Zündhölzli» - Mani Matter

Mir hei es Fondue welle mache – hei dänkt, mir lade s Meiers ii
Aber halt, die hei zwöi Chind! De wäre mir jo sächsi gsi.
Doch d Frau Meier meint, s göng scho
Die zwe Giele chönnte jo
Zu ihrne Fründe go, dört sige si scho lang nümme gsi.

Die einte Fründe si grad z füft, e Sächste wär jo eine zvil.
Drum göh si grüpliwiis i Usgang, dasch jo eh was jede will.
Wird e Gruppe wider z gross,
Geisch als Sächste zrug uf d Stross
Und suechsch witer. Dasch doch glatt! Me seit däm Föifer-Chill!

Die einte Gruppe gö uf Züri, andri zieht's meh Richtig Bärn.
Z Basel sig s schints bsunders luschtig. Bsunders lut isch s gäng z Luzärn.
Schwizer, Türke, Serbe, Däne
(Usser si hei Quarantäne)
Luege dass si z föifte si. Das hei d Behörde gärn.

Bravo, d Coronadisplin isch toll und s Gsetz isch reschpäktiert!
S isch ar Zit, dass sich d Regierig mit me Orde dekoriert!
Ir ganze Schwiz es Riese-Glöif,
Doch überall si nume föif: - - -
S isch doch toll wie das d Sozialkontakte reduziert!



3 S Impfzentrum

Melodie: klassich Basel



Die Susann Schaffner isch scho knallhart bim Regiere.
Si tuet das Impfzentrum für Gränche – zack! – blockiere.
Für einisch müesse mir se do zwar unterstütze:
Me impft jo würklech nume das, wo me wott schütze!

4 Bock down

Melodie: "Sex Bomb" - Tom Jones

"Brünett und elegant und ihres Härz isch gross!"
"Vermögend, Strahlemann und die Figur – famos!"
"Die Blondi do! Für so nes Gsicht, do rönt' i wit!" -
Wie guet, dass es no "Tinder" git.

Jetzt hani de zwe Monet mit keim Typ me gredt.
Abaggere, das goht nur no im Internet.
"Jö die do! Wie kokett! I schriibe! Meinsch die wett?"
"Vergiss es! Mindestabstand au im Bett!"

Lock down, Lock down, dä schiissig Lock down!
S het wit und breit ke Bar me off! Wie find i jetz e Ma?!
Lock down, Lock down – triffsch kei Frau im Lock down!
Und wenn, het si no d Maske a!

Jetzt lueg mol die do: Wüescht, energisch, ahnigslos!
Dä do mit em dicke Hals schribt Fairness gross.
Die do mit em Rossbiss isch für s Schuelsystem.
Und dä het sicher psychischi Problem!

"Gradlinig"?! - Derbi isch nid mol d Nase grad!
Hängebuse, Warze! Aber für ne starche Staat.
Das Arschgsicht, nei! I glaub i go is Zölibat! ---
Cool down, das si doch Wahlplakat!

Bock down, Bock down! Do isch mi Bock down!
Das wirdsch jetz wuchelang a jedem Kandelaber ha!
Bock down, Bock down! Das isch dr Bock down!
Und die hei nid mol Maske a!!

Jo leget dene Maske a!!



5 Coronaopfer

Melodie: «Eskimo» - Matter

Könnet dir das Gschichtli scho
Vo däm riiche Eskimo,
Wo trotz Monete geschter so,
Truurig isch ums Läbe cho?

Är het z Grönland gseit: "I goh
usem Altersheim drvoo."
Het i d Schwiz si Flüger gno
Zum sich Förscht Klass impfe loh.

Dr Dokter do seit "S isch eso:
Corona isch es Risiko
Dir müesst euch dringend impfe loh!
Doch i cha das nid mache do".

Is Impfzentrum söll är goh!
I d Rythalle. Är isch froh.
Doch dört heists: "Was weit dir do?
Zersch müesst dir e Termin `brcho!"

Tifig het är s Handy gno
"Bsetzt"! Är isch i d Combox cho
78 mol eso
Aber är het nid lugg gloh.

Bingo, jetz isch s Datum do
Är isch zur Rythalle zrug cho.
Dört isch d Warteschlange scho
Bis zum Kreisel füre cho.

Und wo n är mit Maske do
I die Schlange isch go stoh,
Do isch s Bipperlisi cho
Und het ne under d Reder gno!

Und dir gseht d Moral dervo:
S Lisi isch es Risiko!
Corona wird emol vergoh
Aber s Lisi blibt bestoh
Gäg das chasch di nid impfe loh!!



6 Marsch

Melodie: Berner Marsch

Am zähni ghörsch dr Wecker goh,
Langsam Zit, zum Näscht uszcho.
Wär so fit I Morge startet,
Wird belohnt, dr Chüelschrank wartet,

Zwüsche Yoghurt und Tomate,
Hets au zwöi drüü Handgranate,
Tuesch drmit nachem Rasiere
Ufem Balkon chli jongliere

Wenn denn afo schaffe chönntsch
Isch scho Zyt zum Mittagslunch
Nach däm Stress settsch noni use
Sondern zersch es Stündli pfuuse.

Mit früscher Chraft, als rächte Ma,
Lohsch denn dr Computer aa.
Dä befiehlt, söllsch retabliere
Und im Reglemänt Värs drü studiere.

Do lütet s Föifiglöggli scho,
S isch Fürebe. D Zyt isch do.
Dir gseht, si tuet ohni z Plagiere
Geischt und Körper gliich trainiere
Si hertet ab, stirb oder friss,
D Rekruteschuel im Homeoffice.



7 Gli wird s

Melodie: "The Wellerman" - Shanty



In China läbt e Flädermuus
Dört schlüüft es chlises Virus drus
Das chunnt zu üs – was fällt däm ii!
Und jetz hei mir die Pandemie

**Refr.: Zyt dass dr Berset chunnt! Berset gäll Du machsch üs gsund!
Du rettisch üs vom lecke Schiff! Alain, du hesch's im Griff!**

Me teschtet dört, me teschet do
Die Tracing-APP nützt mordio!
Ringring ring. Si lüetet aa:
"Hättsch geschter Quarantäne gha"

**Refr.: Zyt dass dr Berset chunnt! - Ihm z lieb teschte mir üs wund!
Är rettet üs vom lecke Schiff! Alain, du hesch's im Griff!**

Au d Pharma-Branche chrampft wie gstört
Die mache üse Impfstoff dört
Dä schützt üs, das isch doch patänt,
Scho gli zu sächs Prozänt ! **WOAU!**

**Refr.: Zyt dass dr Berset chunnt! - So lauft d Pharmabranche rund!
Är rettet üs vom lecke Schiff! Alain, du hesch's im Griff!**

All Geschäft si zue! Au s Puff! No lang.
"Das goht nid! I ha jetz dr Drang.
Nach Gsetz bini, das gseh doch all,
E klare Härtefall!" **WOAU!**

**Refr.: Wart bis dr Berset chunnt! So chunnt d Wirtschaft uf e Hund!
Es isch am Sinke, s lecke Schiff! Alain, du hesch's im Griff! **HEY!****